

UTUSAN MALAYSIA

DATE: 12/7/2010

Rosmah kongsi derita anak Palestin

UM - 12/09/10

KUALA LUMPUR 11 Julai - Isteri Perdana Menteri, Datin Seri Rosmah Mansor berkongsi naluri keibuan apabila membicarakan mengenai penderitaan anak-anak Palestin yang membesar tanpa mendapat kasih sayang ibu bapa.

"Sebagai ibu, hati saya sangat sayu dan sedih apabila melihat penderitaan berterusan yang ditanggung anak-anak tidak bersalah yang terpaksa membesar tanpa mendapat kasih sayang sepatutnya.

"Seperti mana kanak-kanak lain di seluruh dunia, mereka juga layak mendapat hak pendidikan, kesihatan, bekalan air bersih, keselamatan, kediaman dan keluarga mengikut Konvensyen Antarabangsa Mengenai Hak Kanak-Kanak (CRC) dan beberapa lagi konvensyen lain," katanya.

Beliau berucap semasa sesi 'Panggilan Untuk Tindakan' (Call For Action) pada persidangan persidangan Memecahkan Sekatan: Semangat Rachel Corrie dan Mavi Marmara anjuran Pertubuhan Keamanan Sedunia Perdana (PGPO) di Pusat Dagangan Dunia Putra (PWTC) di sini hari ini.

Sementara itu, Rosmah menggariskan beberapa cadangan yang perlu diberi perhatian oleh masyarakat dunia dalam usaha membantu rakyat Palestin terutama di Gaza, antaranya:

- Memastikan sempadan negara berjiran dengan Palestin sentiasa dibuka bagi membolehkan bantuan kemanusiaan dapat disalurkan secara terus kepada penduduk negara berkenaan.

- Misi bantuan kemanusiaan selain daripada misi flotila perlu diperbanyak dan diperkuatkan bagi terus menarik perhatian dunia terhadap situasi sebenar penderitaan yang ditanggung oleh rakyat Palestin.

- Menggiatkan usaha dan kerjasama holistik antara pertubuhan bukan kerajaan (NGO) di seluruh dunia bagi membantu Palestin, memandangkan wujudnya kekangan politik di peringkat negara untuk berbuat demikian.

- Media dunia termasuk elektronik dan cetak perlu secara konsisten memainkan peranan membantu rakyat Palestin, menguar-uarkan kejahatan dan menangkis propaganda jahat Israel serta mengekalkan momentum supaya kejahatan negara itu terus diingati sampai bila-bila.

- Mendesak kapal flotila yang dirampas supaya segera dikembalikan dan memastikan kargo bantuan kemanusiaan itu disalurkan kepada penduduk Palestin.